



Damonda da baghegiar

Nr. 50/2023

Datum da publicaziun: 14-04-2023
Patrun: Candinas Robert, 7130 Glion
Representant: biro d'inschignier Deplazes, 7173 Surrein
Liug e parcellas: Surrein-Tuma; 4307
Object: tschaffada d'aua, nova lingia d'aua, sanaziun dil tetg e midada d'intent dil clauvau agricol en buca agricol

Nr. 56/2023

Datum da publicaziun: 14-04-2023
Patrun: Brandstetter Silvia, 8708 Männedorf
Representant: Jacomet Andrea, 7173 Surrein
Liug e parcellas: Rabiun-Cavivens; 148
Object: sanaziun casa e nova pumpa da calira

Nr. 60/2023

Datum da publicaziun: 14-04-2023
Patrun: Müller Bernhard e Beeler Müller Lisabeth, 9230 Flawil
Liug e parcellas: Cumpadials-Via Cumpadials; 1847
Object: construcziun d'in mir schetg e nova ligiadira dil carport

Il profils ein tschentai ed il plans da construcziun ein deponi tier la canzlia communal.
L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg, 14-04-2023

Cumissiun da baghegiar

Revisiun planisaziun locala - prolungaziun zona da planisaziun

Cunquei che la revisiun dalla planisaziun locala basegna aunc temps ha la suprastanza communal en sia seduta dils 13 da mars 2023 decidiu da prolughir la zona da planisaziun ch'ei valveivla dapi il 18 da fevrer 2019 per dus ulteriurs onns.

La zona da planisaziun vala sebasond sin igl art. 21 dalla lescha davart la planisaziun dil territori per il cantun Grischun (LPTGR) per il territori dall'entira vischnaunca e ha suandontas finamiras da planisaziun:

- a) Examinaziun ed adattaziun dallas zonas da baghegiar (zona dil vitg, zona dil vitg engrondida, zona da habitar, zona da mistregn e da habitar) ordvart ed al cunfin da territoris surbaghegiar tenor prescripziuns digl art. 15 al. 1 e 2 dalla lescha federala davart la planisaziun dil territori (LPT) e dil plan directiv cantunal (PDChant-A) dils 20 da mars 2018.
- b) Applicaziun dallas ulteriuras prescripziuns digl art. 15 LPT e dil PDChant-A cantunal dils 20 da mars 2018, en special pertuccont promoziun d'in svilup da habitadis viers dadens e renovaziun da habitadis (PDChant-A, cefra 5.1.2, instrucziuns d'agir).

Il departament d'economia publica e fatgs socials ha cun disposiziun dils 28 da mars 2023 dau suatientscha alla prolungaziun dalla zona da planisaziun.

Ella zona da planisaziun astga vegnir exequiu nuot che engrevegia ni impedescha la planisaziun nova. Projects da construcziun astgan mo vegni lubi sche tals cunterfan buca alla planisaziun cun vigur legala, alla planisaziun prevedida ed allas directivas (art. 21 al. 2 LPTGR). Lubientschas da baghegiar ein duront il temps dalla zona da planisaziun oravontut da remetter sch'igl intent da baghegiar:

- basegna terren che sesanfla ordeifer il territori ch'ei per gronda part surbaghegiaus. En il suandont cass astga igl intent da baghegiar buca haver consequenzas negativas per in'eventuala dezonaziun dil terren restont (p.ex. negina parcellaziun dil territori da dezonaziun ni creaziun da largias da construcziun).

Encunter la presenta prolungaziun dalla zona da planisaziun sa vegnir recurriu enteifer 30 dis naven dalla publicaziun officiala tier la Regenza dil cantun Grischun (Art. 101 al. 1 LPTGR).

Sumvitg, 14-04-2023

Suprastonza communal

Informaziuns diever d'aua

Retrer aua da hidrants

Tenor lescha pil providiment d'aua e regulativ da taxas tier la lescha davart il providiment d'aua astga mo vegnir fatg diever d'aua da hidrants sin damonda ed encunter in'indemnisaziun. Per retrer aua sto vegnir fatg ina damonda cul formular official. Il formular sto vegnir inoltraus sil pli tard 48 uras avon ch'igl ei previu da retrer aua al caufontauna (info@sumvitg.ch / Administraziun communal, Via Quadras Su 10, 7175 Sumvitg).

L'indemnisaziun dall'aua succeda sco suonda:

- pil consum d'aua: frs. 30.-- per di
- montascha ventil da refluissiu: frs. 20.-- per hidrant

Aua astga vegnir retratga da hidrants sulettamein cun in ventil ch'impedescha ina refluissiu. Quel vegn montaus dil caufontauna.

Il formular ei disponibels sin la pagina d'internet www.sumvitg.ch ni sa vegnir retratgs tier l'administraziun communal. Constatescha la suprastonza communal en quei connex ch'ei vegn retratg aua senza annunziar ei ina procedura da multa resalvada.

Schuar cun aua dil providiment d'aua

Ils menaschis agricols pagan lur taxa da consum tenor art. 2.2 c) dil regulativ da taxas tier la lescha davart il providiment d'aua. Tenor quest artechel vegn il diever per envernonta quintaus cun 50 cubics aua per onn. En quels cubics ei l'aua da beiber per ils animals sco era tut il consum per il diever ordinari dil menaschi cumprius. Tier il schuar praus setracta ei d'in diever extraordinari ch'ei buca cumprius ella taxa ordinaria. Il schuar praus ei perquei sulettamein cun ina lubientscha dalla vischnaunca ed encunter in'indemnisaziun corrispudenta lubius.

Projects da baghegiar

Il caufontauna ei avisaus sin Vossa collaboraziun tier projects da baghegiar. Nus fagein perquei attents ch'il caufontauna sto vegnir clamaus avon che colligaziuns d'aua vegnan cuvretgas aschia ch'el sa mesirar en e notar las colligaziuns.

Nus supplichein per Vossa collaboraziun ed engraziein per Vossas breigias. Per damondas stat il caufontauna bugen a Vossa disposiziun.

Sumvitg, 14-04-2023

Suprastonza communal

Lavurs vid Via Laus (Caplazi tochen sbuccada Via Puzzastg)

Ils 1 da matg 2023 vegn entschiet cun las lavurs da sanaziun vid la Via Laus naven da Caplazi entochen la sbuccada dalla Via Puzzastg. Durent il temps da construcziun resta la via parzialmein serrada. Per ils automobilists vegn mess a disposiziun durent il temps da construcziun in parcadi a Laus. Per saver carrar sill'alp Laus per motivs dall'agricultura ni specials astga durent il temps da construcziun vegnir fatg diever dalla Via Puzzastg.

Per damondas stat Alexander Deplazes dil biro d'inschignier Deplazes (tel. 081 943 25 60) a disposiziun.

Sumvitg, 14-04-2023

Departament traffic

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 21 d'avrel 2023 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas ein da transportar directamein e sin cuost dil caschunader ella deponia regiunala a Rueun. Rumians vegnan buca pri encunter. Tals rumians ein da plazzar als plazz da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds senza ieli e benzin, da tuttas sorts fier, maschinas electronicas senza ieli, mobiliar movibel buc culau giu, requisits dil temps pigns
- per pneus senza gavegl vegn incassau ina taxa da frs. 5.--, cun gavegl frs. 10.--
- per pneus da maschinas agricolas pintgas vegn incassau frs. 20.-- e per pneus da tractur frs. 50.--.
- Calzers da skis san vegnir dai giu en favur dalla ARGO Tavau per frs. 5.--

Buca acceptau vegnan

- tuttas maschinas agricolas, lenna da brisch, veglia e da baghetg, sacs da pupi ni plastic, materials da pachetar, requisits dil temps liber gronds, blachas da ballas da silo, curdems da baghetg, curdem verd da curtin (deponia verda), cartun e pupi vegn rimnau entras la scola

Ils suandonts rumians vegnan rimnai cun ils rumians jamnils:

- sacs tochen 50 kg; 1 marca da frs. 2.50, rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50 e rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directivas en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Sumvitg, 14-04-2023

Departament ambient

Uniun Rabiun anavon

Invitaziun alla radunonza generala dall'Uniun Rabiun anavon da **venderdis, ils 21 d'avrel 2023** allas 20.00 ell'aula dalla casa da scola a Rabiun. Tuttas commembras e tuts commembers sco era hosps ed interessai ein cordialmein envidai. Ulteriuras informaziuns sco era il protocol ein publicadas sut www.rabiun.ch.

Tractandas:

1. beinvegni
 2. elecziun da dus dumbravuschs
 3. approbaziun dil protocol dalla radunonza generala dils 25-2-2022
 4. rapport dil president
 5. rendaquen e rapport dils revisurs
 6. fixar la contribuziun annunala 2023
 7. informaziun plaz Cadruvi
 8. decisiun sprezza da pumpiers veglia
 9. program da lavur 2023
 10. comunicaziuns / informaziuns
 11. varia
- suprastonza Uniun Rabiun anavon*

Uniun SumvitgViva

Lavur cumina dall'uniun SumvitgViva

Sonda, ils 22 d'avrel 2023 envida l'uniun SumvitgViva in e scadin voluntari a far lavur cumina. Nus sentunpein allas 8.00 sin plaz Cadruvi a Sumvitg. Mintgin duei far aschi bien e prender buns calzars, vons ed uaffens adattai per la lavur sin differentas vias d'aul. Suentar la lavur offerescha l'uniun ina grillada. Sin bien seveser, *SumvitgViva*

Biblioteca Trun

Venderdis, ils 14 d'avrel, allas 14.30 raquenta Pauli, il lieuret, ord in cudisch. Envidei ein affons denter 3 e 6 onns che teidlan bugen historias cun lur geniturs, tattas ni tats. Nus selegrein da tia viseta, *il team dalla bibliotecaras*

Club da tennis Trun

Cuors da tennis per carschi

Uonn organisescha il club da tennis Trun puspei cuors per entscheviders e per avanzai cun il scolast da tennis Nic Dermon. Il cuors ha liug mintgamai la gievgia sera naven dallas 19.00–20.30. Il cuors entscheiva ils **4 da matg 2023** e cuoza tut tenor aura 5–6 seras. Annunzias pren Carmen Bearth-Albin bugen encunter entochen ils **30 d'avrel 2023**, 079 283 93 07, carmenbearth@hotmail.com